

KA PA NAHI, KA PASIAN NGEI NAHI

Rev. Thangngur (1891-1943)

Pastor Thangngur khu Pu Thanghlun tapa ahia, kum 1891 in Mizoram a Lailen khuo ah apieng hi. Piendan a zong tahsa hoi, pil leh kizentah ahia, sawtlou nua in Manipur a Senvon khuo ah ahing pemit uhi. Kum 1910 in Manipur simtum biel ah koima lai gel thei leh sim thei ana um naisih a, May 7, 1910 a Sap Tangval kichi Robert Watkins inb Tangthu pha ahing lutpi in School a hong hi. Rev. Thangngur zong tam School a kai masa pawl ahia, kiel a nasat seng zieh in school kai zong zom zoulou phiel in a hing um uhi. Tuachin Rev. Thangngur leh midang-6 in chawmna (stipend) nga in Tuithaphai (Lamka) a Mr. Vunga School ah akai uhi. Anua in Senvon khuo ma ah sunzom in pass teitei ut zieh in kum-2 sung zet azil nua in Aizawl ah exam in Pawl-VI a zou hi. Tuachiin amau hun lai a ding a laisiem a theiphah ahing hita hi. Alawite Mr. Dekah leh Mr. Phaka in Dibrugarh ah Compounder a zil ua, Rev. Thangngur in Senvon School ah a sem hi.

Rev. Thangngur in sorkal a sepna anei ding deisah in Senvon khosung lamkaiten Mr. Gasper Sap kung ah ngetpieh in tua ngetna lai puo in Rev. Thangngur a zinsah uhi. Rev. Thangngur vang Pasian nasep a utpen ahiban ah tam tan tung thei ding a chawmtu Mission nuasia a sorkal nna sep mai ding vang a ki-awi mama sih hi. Alelam ah mi zousie in sorkal nna a szep ding a deisah ua, Lungthulien ahing tun tah in sorkar nasem ding chi in a mukha pou in kipahpi in chibai a buh chiet uhi.

“Sorkar a sepna sui ding a, Churachandpur a zin tahtah ding ka diei?” chia kingaituo in Lungthulien leh Parbung kikaal a “Suong Khawlmun” ah khawldam in Pasian kung ah ahing thumta hi.

“Mangpa, Mission lamkaiten zilsahtu ding in ahing dei ua, khosung mipiten sorkar nasem ding in ahing sepna ua, ahing dei uhi. Nang’ bang nasem ding in nahing dei ei?” chiin a thum hi.

A thum zou in a umna gei ah Kross a Jesu kikilden amu phut a, a thum kia a, amu ngai ma amu kia a, tua tam aw ahing zata hi: “Thangngur, na khelna tengteng apat hing tankhie in siem kahing tangsah a, tam thu puong ding in koi ka sawl diei?” chi ahia, “Mangpa, hing ngaidam in” chi kawm in Senvon khuo ah a kile kia hi.

Mipi deisahna toh sorkar a sepna sui ding a zinkhie Rev. Thangngur ahing tun kia phut in khotaang houlimna thupipen ahing hita hi. “Puohgih tahtah ka nei a, Lungthulien gam ‘Suongpi Khawlmun’ a thumna ka nei lai a ka mudan dungzui a Mangpa’ nasem ding a hing kia kahi. Tahsa sil et mai in zong Pasian in Mission lamkaite zang in ahing siem pichingta a, khovel toh kikhien sawm kahita” achi hi. Khosung lamkai leh mi khenkhat in vang kipahpi seng sih na uleh Mission lamkaiten kum 1918 apat school a sinsahtu ding in a lata uhi. Kum 1917 a Senvon Revival a um lai a piengtha ahizieh in Rev. Thangnur in hagau mangthai dingte leh gamsung a siemsinna ama khut a kinga hi in a kingaituo hi.

Senvon Hausapu Kamkholun’ tapa Pu Chekkang in Kawmzar a kisuon ding thupuon anei zieh in inn-300 vel lou ha theilou a “paamtul” in a dalzahta uhi. Tuachiin Senvon a Mission School zong Khuangzang ah suon ahita a, kum 1922 in Khuangzang a bawhta inn a a ten lai in Pasian thu awiloute a vei mama zieh in “Hinna Siengthou Siempa dei sih uh Zion ah” chi laa ahing phuota hi.

Gingtu umlou, dawibiehna leh kitheoina a uong bawl mama ua, tu nua chieng a hun hing tung ding ngaituona malmal a neisih ua, miten mawltah a hinkhuo azah lai un Rev. Thangngur in “Tangthu pha thu piendang, Na zata amahj?” chi laa ahing bawl kia hi. Khuongzang apat Tinsuang ah ahing kisuon ua Rev. Thangngur pen Headmaster in a kaisangta hi. Hinanleh sawtlou nua in Mission Lamkaite H. H. Coleman leh Sap Tangval Watkin Roberts kikaal ah kitheisiemlouna ahing umtah chieng in Rev. Thangngur a ding in koipen lam bel

ding chi thupuana bawl a hamsa mama a, Mission tungtawn a damsung a Pasian nasep ding thupuana a bawlta ngal a, bawlkhiel ahi thei mai diei?

Hun sawtlou nua in Hattuum ah buoina hing tung in, Mizoram Khawlerk a khawmpi a haw ding in Rev. Thangngur a zinkhie hi. Lungsim puohgih lientah toh Mission nasep tanpha tawpsan mai ut in, mun khat ah khawl tawldam in, Manipur taanggam ahing gal-et hi. Alungtang sung ah “Shitan in gin-um in, tuachiin hinna Manglukhu kahing pe ding” chi thu ahing suoh a, hitui luong zoizoi in “I lungsim siet miel zing nei ah, Van hinna chi kiphum hi” chi laa ahing phuo kia hi.

Hattuum mai hilou in namkal buoina hun ah Manglukhu mai hilou in “Damna Gospel” gen leh kepbit a poimaw mama a, hinanleh khum ding a pang ngam mi a hamsa mama mai hi.

Hattuum sung a buoina uong semsem in lamkaite zong kilangkhen ua, biel pumpi ah gingtute a basam mama mai ua, semtute zong mi-7 maimai a phata uhi.

Tambang hun lai in lamkaiten siemlou pumpum in Lushei ham in laa asa ua, thu gen in thumna nei uhi. Rev. Thangngur in vang azu-ava, ganhing chi chinteng ten zong amau ham dan tuomtuom in Pasian a phat chiet ua, amau ham in biehnai nei ding a lunggul tinten hi. “Ham” thu a buoina um laitah in

“Hundamna khu ka thei masang,
Singdang Pasian ahiei aw chi ing e;
Atangthu pha ka hing simleh,
Ka Pa ka mansah Ana hi”
chi laa ahing phuo kia hi.

Khatvei a seppiten Gangte biel, Guite biel leh Hmar biel fang ding a zinkhiet asawm ua, “Lushei ham maimai zang vai in, Rev. Thangngur in zong hing zuiheh” achi ua, ut mananleh “Ham” thu a tel se zieh in Rev. Thangngur lungsim ana sim a, tuachiin “Simlei pahna tomkal i khietlah, Tangtawn pahna ding van pahna zong veni” chi la ahing phuokhie hi.

Headmaster dinmun sang a sangzaw tu ding a chiel hinanleh Rev. Thangngur in Mission nuasie in Independent Hattuum a zom a, tuachin a sepna zong a tawpsan hi. Tinsuang a kum-2 sung Lou ahaw zou nua in Vangai Tang Phulpui ah Rev. Thangngur a pem a, kum-2 sung khum khuo ah Lou ahou hi. Kum 1934 in Hattuum in Phulpui ah Khawmpi anei ua, Pastor ding in a namkipta uhi.

Khatvei Rev. Thangngur biel ve in Sartuinek khuo ahing tung a, inn khat ah tui dawn in a tawldam hi. Inntehte kung ah a huon ua a theinoute uh suon ding hawm ding in a ngen hi. Ama un zong a suon hun chieng a theinou thum pieh ding in a chiem uhi. Tua zou in a gensa bang in Rev. Thangngur hing pei in theinou thum a bot a, napa hing a tuun in, inntehte inn ah singpi dawn in a houlim uhi. Hinanleh Hattuum sung kisiet laitah ahizieh in Setan in hun lem a zang in thubuoi dang ahing kipanta a, Mr. Gasper Sapo kung ah heh a a um bang in Rev. Thangngur khu Guta a ngaw in dan dungzui in Rs. 50/- a lieu ding chi ahita hi. Rev. Thangngur in zong a dihna thu ahing gen a, tuachiin Gasper Sap in a hehtute kung ah “Rev. Thangngur in theinou ahing ngen a, na phal nua in nou theipi mama in theinou a bot a, singpi zong na dawnkhawm ua, tuazieh in amaw khu nou nahi zaw ua, na lieu ding uh ahi” achita hi. Rev. Thangngur in zong “Pu, ken amaute ka ngadamta, nang zong ngaidam in” chi a a ngetsah zieh in Sap in zong theinou neitute a ngaidamta hi.

Khatvei ma lah biel ve ding a Rev. Thangngur a zinkhiet sawmleh a khote khat in deisahtah dan a kigen in natang (banana) paw ding in a chiel a, hinanleh Rev. Thangngur in ahing tun kia chieng a tua natang puohpi ding in a ngenzawta hi. Tuachiin khatvei natang puo ahing tun in guta a ngaw in a um kia a, natang neituten lieusah ding in a ngaituo uhi. Rev. Thangngur in zong tuabang a guta ahileh amau zong a lieu hun uh um thou ding ahidan gen in lieu zong khawh kasasih achi a, hinanleh natang neitu lam innkuonten midang in

guta zong ngaidam ahi chieng in guta hilou pen i ngaidam ding chiin Rev. Thangngur a ngaidamta uhi.

Bulah hun hinanleh Senvon khuo a biel khawmpi ah Rev. Thangngur a haw teitei hi. Louzau ah ngal tampiten bu nesie ahizieh un louneituten a veng chiet uhi. Bulah hun a khuolz in chiin mi tamtahten Rev. Thangngur a mawsah ua, Sabengten Rev. Thangngur umlou kaal in ngal in abute ne ding ahi chiin ngal mat sawm in a vatangh ua, hinanleh ngal in a ne sih a Rev. Thangngur lou khu a bit hi.

Lou a kipat abut inn potung zou manlou in Rev. Thangngur biel ve ding a zinkhie a, ha khat vei a zin sung in koi ahie khat in a bute a guhsah laitah mi mit a mu ana um a, tuaten hausa uapate kung ah a tut ua, ‘Salam’ sat/lieu ding chi ahita hi. Rev. Thangngur ahing tun tah in kilawptah in Rev. Thangngur kung ah ana gen ua, Rev. Thangngur in vang “Khawh na e maw?” achi lel hi. Zan tungtawn in a kingaituo a, zankim vel in azi kung ah “Ketli in singpi awm inlen, ngaidam vangen vai. Neilou a gutu lieusah be nalai chipen vang gitlouna valsan ahi” achi a, azi in pen, “Ei khelna umlou, guta in ngaidam hing ngen zong hisamlou, tambang sil um ngaisih” chi nanleh, Rev. Thangngur in, “Eiten zong ngaidam nget dan i thei masang in Pasian in atapa Jesu shi zieh in ahing ngaidamta. Tuazieh in ‘ngaidam’ ihi chi beh i vatheisah ding” chin in a kuonpi thouthou hi. Inn ahing tun kia zou un Rev. Thangngur nuomtah in a imu pai hithiet hi.

“Van inn shina luigal,
Gamlatah a mangte sui diing in;
Giloute tang a shi diing in,
Van Mang ta ngei hing sawlsuh in;
Midang a theisiem umlou amah?

Rev. Thangngur biel ve ahing tun kia ni khat azi in zong pilvangtah a tui dawn ding pie in kisilna ding tui a bawlsah hi. Rev. Thangngur kisil zou, ahing khawldamta a, tuachiin

a zinna thu leh a zin sung a sil tung tuomtuom a houlim in thum ding in ahing kisa uhi. Azi in nitah ann ding Pasian kung a nget ding in ahing genkhie hi. A thum zou un nou khat tawi in dit kia ding anntang nou khat maimai ngen ding in azi a sawlkhie hi. Hinanleh bupang leh phailael a anntang tamtah nei a innvengte un “Nou zong na khuolzín sung un lou hou leh uchin ann na nei tha sih ding uoi, nou a ding a khatvei, khatvei chia na hing nget thithe uh, tuntung in vang hing pe sih va ung” chi aw va ngaikhie in Pastor-nu zet khutguoh in inn ahing lut kiata hi. Lam-etna nei kawm a koite ahiei neisa ngen seselou hi uleh vang lei leh van leh a sung a umte tengteng neitu, kumpite Kumpi nasemtu Rev. Thangngur-te nupa a thuoh uh a nuom tuom deu ding hi. Tuachiin Rev. Thangngur in tam laa ahing phuo a, a tul theisih hi.

KA PA NAHI

Late 18:2

-Rev. Thangngur

1. Ka pa Nahi ka Pasian ngei Nahi,
 Tam lei jinmang sala ka taan lai in;
 Na lungsietna thupieh ahing tung a,
 Hing kiatan hundamna Ka siem zouta.

Na hepina thupieh zop khu,
 Kisia um ngai vawtlou maw Mangpa;
 Tam leimi leh Vanmi tanpha'n.

2. I aw Mangpa na guoljawlnate khu,
 Nang sang in mi nempí'n a ngaizaw uh;
 Tahsap vang a luonhi a nailai zong,
 Na gam leh na belna'n hing nai jel in.

Nang bou Mangpa kahing neileh,
 Bang dang ngai nawn tasia'ng maw Mangpa;
 Bangteng a ka bangkim Nahi.

3. Mi tul nempin tam lei nopna sui in,
Mel mulou in phamna hanmuol liem uh;
Thupina liim adel uh meylim bang,
Mu a tangten zong a nei den sih uh.

Jesu Nang bou nei tah Nahi,
Kumtawn dong a loupi leh hoi deudeu;
Lei len Van a vangpiehna lul.

Rev. Thangngur khu thum mi mama ahia, Phulpui khuo gei gamlah ah tuni tanpha in “Rev. Thangngur Thumna Mun” kichi um a, kum 1935 in Assistant Field Superintendent a sem a, kum 1943 in Superintendent sem in biel pumpi a ve suoh hi. Zunhum natna zieh a a tahsa aba mama nua in zong khiengkhun toh Biehin a zuon teitei a, “Ka shileh shi ka hi ding a, ka damleh damlai ka hi mai ding” chi khu lupna tung a a hamkam nukhiapente lah a khat ahi. Tuachiin a khuolzinna zou in December 20, 1943 in anna a sep a PA PASIAN kung a zuonta hi. Kum 52 maimai dam hinanleh ama laphuo tapi Labu tuomtuom ah atuong a, ashi nua tanpha in lungkham leh thawmhaute hamuontu leh Hattuum hinna chawmtu ahi hi.

.....